

A Roma sco gardist

■ **A Roma meinan biaras vias e biars ein gia stai a Roma. Mo ei dat pli probabel paucs vitgs el Grischn ch'han giu ils davos 20 onns tons gardists en la Guardia svizra papala sco il vitg da Ruschein – quei en relaziun cun il diember da habitonts.**

Quater dad els ein hosps en la proxima occurrenza «da cuminionza a Ruschein – la sera dils treis» ussa gievgia, ils 3 d'october. Els laian reviver lur temps a Roma, raquantan da lur motivaziun e tradeschan era tgei ch'els han empriu el Vatican per lur entira veta. Sch'ins damonda in gardist tgei che seigi stau il punct culminont da siu temps a Roma sche vegn el pli probabel a menziunar il gi da sia saramentaziun. Per ils novs recruts ei quei mintg'onn ils 6 da matg, il gi dil «Sacco di Roma». En lur engirament, en l'uniforma tricolora blau-cotschna-melna, empermettan ils gardists ch'els seigien prompts da survir al



papa, proteger el e da schizun dar lur veta per el en il seracass. Mo la veta d'in gardist sespleiga buca mo en l'uniforma da gala. Tgei ch'ella cumpeggia el mintgagi e tgei ch'ella porscha el temps liber, da quei ed auter raquantan ils ex-gardists *Christian Casanova*, *Duri Coray*, *Franz Klaiss* e *Michael Schwitter*. Franz Klaiss ei ent-

raus en la Guardia svizra papala avon 20 onns cura che papa Gion Paul II era en uffeci. Michael Schwitter sco era Christian Casanova han surviu a dus papas, numnadamein a Gion Paul II ch'ei morts la primavera 2005 ed a papa *Benedetg XVI*. E Duri Coray era a Roma cura che Benedetg XVI ei seretratgs ed ha desistiu

da siu uffeci il fevrer 2013 e che papa *Francestg* ei vegnius eligius. Tuts quater ex-gardists gin ch'els hagian buca mo empriu talian a Roma, mobein aunc bia auter. En lur survetsch ein els stai uras ed uras sin peis, els ein stai communtai da messas pontificalas ed els han passentau ina buna part da lur temps liber cun camerats. Sco gardist papal vivan ins en in auter mund ch'il rest dil mund, ein els perschuaadi. Da quei mund e da quei temps vegnan els a raquantar ed era musar e commentar zacontas fotografias. Beinvegnidas ein sco adina era persunas d'ordeifer. L'entrada ei gratuita e suenter l'occurrenza vegn offeriu in aperitiv.

«A Roma sco gardist» gievgia, ils 3 d'october 2019 allas 20.15, casa da scola Crestas, Ruschein. Dapli sin www.dacuminonza.ch

En num dalla grupp d'interess «da cuminionza a Ruschein»: Maria Cadruvi

MAD